

254



續文獻通考卷之二百五十四

後五代 仙釋考 名釋下 皇明進士雲間王圻纂輯

謙光和尚頗有才思飲酒食肉與俗人不殊常曰吾願鷺
生四足鷺着六裙

正勤姓韓氏五代時任常州天慶觀有僧問如何是釋勤
曰石裏蓮花火裏泉又問如何是道曰楞嚴峰頂一莖
草又問禪道相去幾何曰泥人落水木人撈晉天福中
無疾而逝

宗本無錫人師事道昇禪師住淨慈寺民張氏有女死母

夢女曰我以罪為蛇既覺得蛇于棺下本為說法復置
故處俄有黑蟬翔棺上毋祝曰若我女當入籠中蟬遂
入籠中本復為說是夕毋夢女曰二報已解脫矣其顯
化異數多類此○布袋和尚在奉化縣岳林寺常繡腹荷
一布袋凡供身之具盡貯袋中隨偃卧時號長汀子天
將雨即着濕草履途中驟行亢旱即曳高齒木屐豎膝
而坐梁貞明三年于寺中東廊石上端坐而逝

義收後梁時僧居萬歲山時春不雨至五月義收積薪通
衢將自焚烟舉而雨降遊洪州民俗遮留乃截左臂付

之曰去後不雨出以禱果應

員遠慈谿人戒行清苦吳越寶正丁卯創庵于菴湖講演
經教聲浹海隅及示寂古生蓮花窆於寺南

師誓慈谿人五代時結屋花嶼有白龍聽經因名白龍寺
伏虎大師汀之寧化人時汀苦旱結廬龍潭側曰七日不
雨願焚幻軀七日炬將舉甘雨如注有猛虎見師來即
遠遁今長汀縣有廣福寺云五代時伏虎大師道場也
行雲不知何所僧至福州陳洪進禮之一日謂洪進曰汝
當為此山河主後果牧泉州行雲來見曰凡世報莫不

前定苟懷疑殺人鮮能令終故陳主雖廢張思漢幽于別墅竟以壽終

何令通南唐時為國師言牛頭出利不利謫休寧乃來芙蓉峯更名慕真一坐四十年豁然大悟宋天禧中一夕正席跌坐忽心火目灼頃刻而化其徒收舍利為塔葬之玄寂南唐僧也姓高自言高駢族人昇元中受業昇元寺性爽悟博通經藏保大中詔講法華經授左階僧錄內供奉明教大師賜紫服然不守戒律日以狂飲為事嘗行歌于路曰酒禿酒禿何榮何辱但見衣冠成古丘不

見江河變陵谷與群兒互相答和旁若無人坐是落職出居長干寺

應之南唐僧其先閩人習柳氏筆法以善書冠江左初舉進士一黜于有司投冊罵曰吾不能區區章句取程于庸人保大授文章應制大德中賜紫衣凡禱祠章一筆即就元宗喜楞嚴經命馮延之為序而應之書焉既成上之元帝嘆曰是深得公權之法者也嘗以讚禮之文寓諸樂譜其聲少下而終歸于梵音讚佛協律自應之始

宋

法天本中天竺摩伽佗國僧也來至鄜州與河中梵學僧
法進共譯經義始出無量壽尊勝二經七佛贊知州王
龜從潤色之法天獻于闕下宋太祖詔見賜紫衣袍
竺道生鉅鹿人生而穎悟聰哲若神遂改俗歸依沙門竺
法泰年十五便登講座雖宿望老僧莫敢酬抗初入廬
山從遊長安還止青園寺太祖深加嘆重尋入吳之虎
丘山盤石為徒講涅槃經石皆點頭後入廬山升法座
而卒

遇賢姓林氏建隆初來居建州之明覺禪院常以酒肉自
縱酒家或過其飲則售酒數倍于他日人稱為酒仙語
人禍福多驗以符治病必痊創佛舍用錢數百萬雖稱
丐于人而人不知所自來

妙空名守訥嗣法于雪峯卯一齋住嘉祐潭院江南李氏
三召不起王繼勳詩曰白面山南靈慶院卯齋道者
雪峯禪

慈濟僑居丹陽普定寺嘗遇異人授異錫丹方洞明醫道
察脉如神與神濟同以醫名

贊寧姓高氏有文學洞古博物著書數百卷武肅諸王公族咸重之署為兩浙僧統賜號明義宗文後隨倣歸朝王元之輩嘗就質疑柳仲塗守維揚嘗贈以詩有空門今日見張華之句太宗朝嘗召入對改號通慧僧肇法師遭秦王難臨刑偈曰四大元無主五陰本來空將頭臨白刃猶似斬春風

寶安禪師蘇州人姓夏親運土石于精嚴寺立五臺院時壽八十餘歲不衣絲縷寢卧亂草深明宗旨寂後肉身不壞閣維空中盤旋化畢祥雲始散

法聰姓仰氏初受具戒于梵天寺叅諸方密契心印太平興國中結廬佘山之東峯有二虎大青小青為侍掛一書梁間見者問之曰此佛經也問曾讀否曰既知其義何再讀其他問者皆嘿然不對天禧初跣足而逝閱月容貌如生

南安巖尊者自巖姓鄭氏泉州同安人年十七為僧遊方嘗謁西峯耆宿雲豁依止五年密契心法懷仁江有蛟為害公以偈戒之而蛟去過黃楊峽渴欲飲會溪涸公以杖摘之得水武平黃石巖多蛇虎公止住而虎可使

續文獻通考
令四遠聞之大驚畫像以祭游南康盤古山三年而成
叢林宰相王欽若大叅趙安仁等皆有詩贈之公不視
置承塵上而已淳化辛卯寂壽八十有二謚曰定光圓
應禪師

義澄富陽人俗姓孫投新定龍門寺僧德詮出家周顯德
中年已五十八始祝髮訪道四方宋咸平中住信州玉
山洞巖縣令章得象異之以聞真宗召至闕賜號明慧
大師後還錢塘因微疾作偈曰本來無質豈有去住要
識真人南來北去端坐而逝時年百二十八歲

道源東吳僧常續開平以來宗師機緣統集寶林聖胄等
傳為傳燈錄三十卷詣闕進呈真宗覽之嘉賞敕翰林
楊億等刊正并撰序頌行天下

靈芝律師四明人有戒行嘗造五臺戒壇忽一老人獻三
珠來賀

智禮字約言四明金氏子真宗賜號法智大師天台智者
之學禮為中興

智圓法師字無外自號中庸子或稱潛夫錢塘徐氏子聞
奉先源清師傳天台三觀之旨問辯凡二年而清沒遂

居西湖孤山與處士林和靖為隣友夙嬰瘵疾乾興元年寂年四十有七遺命以陶器二合瘞之後十五年積雨山頽門人開視陶器肉身不壞爪髮俱長唇微開露齒若珂貝乃更襲新衣屑香其上重瘞之崇寧三年賜謚法惠大師其所撰述般若經遺教經疏各二卷瑞應經不思議法門經無量義經普賢行法經楞嚴經疏十卷又撰闡義鈔三卷索隱記四卷刊正記表微記一卷垂裕記十卷發微機要記二卷百非鈔一卷三德指歸二十卷顯性錄四卷撫華抄二卷西資抄一卷詒謀抄

一卷谷響抄五卷折重抄一卷正義一卷閒居編五十一卷皆假道適情為法行化之傍贊云

洪蘊長沙人本姓藍母翁初以無子專誦佛經生洪蘊年十三出家于郡之開福寺後遊汴梁以醫術知名太祖召見賜紫方袍號廣利大師咸平初補右街首座累封僧錄洪蘊尤工于診切先時言人生死無不應湯劑精至貴戚大臣有疾者多為診療

婁道者漣水軍人生有異相掌中一目中指七節長為承天寺僧有大智慧能逆知吉凶真宗嘗召問禁中事仁

宗初生晝夜啼不止道者摩其頂曰莫叫莫叫何似當
初莫笑啼遂止後歸鄉有新知軍雅不喜道者遂告戒
徒曰緣盡當滅乾興元年正月右脅側卧而化知軍疑
其詐死命焚之凡三日衣衾不動忽雷雨驟作薪火皆
滅口中出白烟自焚立盡獨留目眼與舌不壞舍利無
數邦人葬之淮岸號證因大師

法智明州人姓金氏住持延慶寺真宗召脩懺法厚有賜
予翰林學士楊億駙馬李遵最薦以紫衣師號天聖六
年寂壽六十九趙清獻公撰碑銘

遵式姓葉氏字知白台州寧海人母王氏夢嚙明珠而生
稍長為僧嘗入國清對普賢像燼一指誓傳天台之教
雍熙來謁四明北面受業

嵩青澗縣僧趙元昊以其將野利王為腹心种世衡謀
去之察嵩堅朴可用誘與冠帶充指揮使致命富貴忽
怒之大加掠治嵩惟感恩不怨乃召嵩曰吾有事使汝
雖苦甚于此能不言否嵩曰誓以死報乃草一書遺野
利王寘嵩衲衣內戒曰非濱死不得洩并以部棗及畫
龜為信野利度嵩別有書索之荅以無有野利乃封其

續文獻通考
信上元昊數日召嵩詰責命曳出誅之嵩大號且曰始將軍遣嵩遺野利王書不得妄洩今不幸不了將軍事元昊急使人追問嵩具以對乃褫衲衣取書以入元昊於是始疑野利釋嵩送還嵩還而野利已報死矣嵩後命以官不受仍為僧終身

婺州雲幽重憚禪師

一名法雲

初謁雪峰次依石霜乃開悟旋

即隱居蔽形惟一衲偈曰幽隱一隻箭虛空無背面射去徧十方要且無人見

雙溪布衲如禪師病時嵩禪師戲以詩悼之曰繼祖當吾

代生緣行可規終身常在道識病懶尋醫貌古筆難寫情高世莫知慈雲布何處孤月自相宜師讀罷舉筆答曰道契平生更有誰閑卿于我最心知當初未欲成相別恐誤同參一首詩投筆坐亡六十年後塔戶自啓真容儼然

福州東山雲頂禪師泉州人以再下春闈往雲臺大吼寺剃染具戒即謁大愚繼見尊宿始徹已事道學有聞叢林稱為頂三教

志言壽春人自言姓許落髮東京景德寺相貌奇古笑語

無度時從屠酤游飲啗無擇衆以為狂然事多前知仁
宗未立嗣默遣內侍至志言所志言書有十三郎字人
莫能測後英宗以濮王第十三子入繼衆始悟嘗有具
齋薦鱠者并食之臨流而吐化為小鮮郡泳而去嘉祐
戊戌將死作頌仁宗命以真身塑像寘寺中人見額上
有光就視之得舍利志言一作
言法華

懷丙真定僧也巧思出天性郡有木浮圖十三級久而中
級大柱壞欲西北傾他匠莫能為懷丙別作柱命衆工
維而上已而却衆工以一介自隨閉戶良久易柱下趙
州洹河石橋鎔鐵貫其中歲久鄉民多盜鑿鐵橋遂傾
側計千夫莫能正懷丙不役衆工以術正之使復故又
洹河中浮梁用鐵牛八維之牛且數萬斤嘉祐中水暴
漲絕梁牽牛没于河莫能出之者懷丙來大慶關以
三大舟實土夾牛維之用大木為權衡鈎牛徐去其土
舟浮牛出轉運使張燾以聞賜紫衣

則全孚叔平姓施氏慈谿人落髮于邑之保國寺住三學
三十年太守郎簡禮之嘗謂人曰叔平才氣凜凜然若
儒冠使職諫諍豈下漢汲黯唐魏徵我朝王元之乎慶

曆五年別衆坐亡世號三學法師

從謙慶曆中住漳州開元寺日誦經說偈辟穀不食者四十年後歸岐山石門洪覺範有詩贈之大覺師亦有詩何大士營道人弱冠悟佛學慶曆間呂仙訪之相為指明宿植謂其為定光佛後身惟朝夕持念釋迦觀音名號有來叅者率為偈答之練提刑遇之言有所契大士云在家能出家火裏生蓮花後無疾而逝

智緣隨州人善醫嘉祐末召至京舍于相國寺每察脉知人貴賤禍福休咎診父之脉而能道其子吉凶所言若

神士大夫爭造之熙寧中王韶諫取青唐上言蕃俗重僧而僧結吳叱臘五部甚衆請智緣與俱至邊神宗命智緣入蕃中說結吳叱臘歸化而他族皆因歸款召還以為右街首座

德賢上猶人號棲真尊者治平間結庵了山習禪要元豐五年九月忽自圖其像于壁上對衆說偈云井雲歸洞本無心流水下山非有意言訖而化弟子以靈骨建塔有禱輒應

啞女不詳姓氏熙寧中見于鄞之戒香寺婉孌非角暗不

能言惟日持帚垂臂跣足晨粥午飯每拾菜滓餲餘啖人以為顛騃歷人家預知休咎里士周鏐趣裝將應舉女笑不止再三叩之乃作長短句曰風波未息虛名浮利終無益不如早去陪簔笠高卧烟霞千古企難及君今既已裝行色定應雁塔題名籍他年若到南雄驛玉石休分徒累卞泣鏐襲藏之一日女露卧鎮明嶺下或訶以不檢遽起歸寺長吁坐逝鏐具棺殮之柳亭後鏐見女子京師追問之不就歸發其瘞則空棺也鏐果中第如南雄以言事忤時相入黨籍衛開客洛陽遇李

士寧曰公鄉里啞女者過去維衛也子可歸禮之比歸開以不及見為恨明年游錢塘寓書吏陳式家見郡兒數十執幡蓋擁一尼童入門譁傳曰啞啞啞開驚顧女書偈曰大地山河是阿誰了無一法可思惟夜來處處鳴鐘鼓敲破髑髏人不知又曰須彌山上擺鐸大洋海底搖鈴若問啞女姓字只此便是真名擲筆徑去開追問小兒啞女何人曰衛佛也又問兒等何人曰問取啞女忽俱不見

本如勾章人初學於法智頌曰處處逢歸路頭頭是故鄉

本來成現事何必更思量慶曆中賜號神照嘗居白蓮寺有虎睡西南隅以杖擊之曰非汝所居虎遂去普庵宜春人姓余住慈化寺禪學最深嘗講華嚴經豁然大悟作偈曰捏不成團撥不開何須南嶽與天台六根門首無人用惹得胡僧特地來後果有異僧至與相詰難一旦遂能嘿記旁通知未來事

元照字湛然餘杭唐氏子錢唐靈芝寺律師也居靈芝三十年衆常數百撰資持濟緣行宗應法住法報恩諸記十六觀小彌陀義疏及刪定律儀本今剛疏芝園集若

千卷自號安忍子一日聞空中笙簫聲遂寂時年六十九

海月名慧辯華亭傅氏子生時有異父母令出家入普照寺得法明智遂領寺事遷至杭州都僧正蘇軾倅杭甚高其行一日合掌坐化遺言須東坡至方合龕四日軾至見其跌坐如生頂尚溫遂以詩哭之曰生死猶如臂屈伸情鍾我輩一酸辛樂天不是蓬萊客憑仗西方作主人

石塔長老遺其名住石塔寺蘇軾守維揚與之往返後退

院歸西湖軾以詩留之

澄源杭州晉水法師也晉江人姓楊氏受華嚴于五臺承
遷後高麗僧統義天航海問道申弟子禮蒲宗孟奏易
惠因禪為教命公主之義天還國以金書華嚴三譯本
一百八十卷遺師為主上祝壽師乃建大閣奉安之時
稱為中興教主元祐三年寂稱晉水者以其先世為泉
之晉水人也

元淨杭州龍井法師於替人姓徐氏始生左肩肉起如袈
裟條八十一日乃沒伯祖異之曰宿世沙門必使事佛

八十一者殆其筭歟後果符其數十二就學于慈雲不
數年而齒高弟杭守呂臻請住大悲閣為請錫紫衣辨
才之號後居龍井蘇軾嘗問此山如師道行者幾人曰
沙門多密行非可盡識元祐六年寂蘇子由為銘

俞紫芝為僧王荆公甚喜之其弟淡字清老亦不娶滑
曉音律荆公亦喜之一日曰吾欲為浮圖公欣然為置
祠部約日祝髮復曰吾思僧亦不易為祠部已送酒家
矣

王法昌建陽人生不如葦幼失父母落髮入福先寺服勤

苦事不拔生草不剪生紫著破衲以養蠟虱時常翻易
使之均飽熙寧辛亥忽告人曰吾來年五月十八日當
去至期果然人異之

姚宥安福州人幼習儒業長落髮為僧熙寧中至建陽往
武仙山一百二十里朝發午歸鍾樓顏朽人莫敢登宥
安上梯解鐘如履平地劉朝奉祈嗣曰某年某月與爾
一子可名姚哥至期果然人驚異之

義天姓王氏高麗國仁孝王第四子辭榮出家封祐世僧
統元祐初入中國問道勅主客楊傑送至錢塘惠因受

法至金山佛印坐納其禮傑驚問印曰義天異域僧耳
若屈道徇俗諸方先失一隻眼何以示華夏師法乎朝
廷聞之以為知體至惠因持華嚴疏鈔咨決所疑閱歲
而畢于是華嚴一宗文義逸而復傳

應定大師初波利尊者自西土來住盤古山時有諺曰後
五百歲有白衣菩薩自南方來居此山是定光佛也至
是應定大師應之

禪惠大師名山人屢舉不第元祐間郡守呂由誠以僧勅
戲之師即削髮明日住天寧舊老叩以佛法不許乘馬

師曰文殊駕獅子普賢跨象王新來一個佛騎馬也何妨其機敏不一有禪惠語錄行世

寶崖涪陵人自幼寡言不嬉笑出家為僧以布裹五指燒之曰信佛如此可也人以為有風疾何不治之荅曰身皆空耳四大五支復何有耶為四眾說法詞切義要後投火滅身而心不滅

守千藁城人居龍興寺性聰慧無幽不燭元祐間賜號通照大師一日發囊以紙衣一襲付其徒至旬乃易衣誦經辭眾逝

崇辯脩行中山弟子甚眾一日謂弟子曰吾行業已滿當歸佛道遂化弟子撫其尸則柔軟始知為尸解云

法普仁壽人幼不茹葷精勤踐履苦行卓然居仰山四方緇流多從之張商英聞于朝賜以紫衣服後杖錫雲遊久之復歸思居靜惠室有僧在其中夜夢神告曰此非汝所覺即遷別舍明日法普至而居之宣和初召住岳麓辭不往作頌而逝

景祥禪師南城人少警敏削髮叅禮名師受戒後進明湘真如法席心法益明四方迎進之書踵至俱不受會泐

續文獻通考
潭鍾陵師心欲得之使者三往返乃行宣和中浩然歸
老秀峯之下未幾為范丞相奏居浮山久之跣跌而逝
處州法海立禪師因朝廷有旨革本寺為神霄宮師升座
謂衆曰身尚不有身外鳥足道山僧去矣一任駕鶴仙
人來此書符作法助無為之化擲下拂子竟爾趨寂郡
守奏其事改其寺曰真身

汝州天寧明禪師改德士日登座謝恩畢乃曰木簡信手
拈來坐具乘時放下雲散水流去寂然天地空即斂目
而逝

聖僧往來乞食海州人有疾呪之即愈事多前知安撫使
丁公守城僧一日左持斧右持釘行擊于市大呼曰釘
壞我斧人無喻者越數日丁果叛僧示寂州人葬之成
一高阜水旱禱之有應

臨安府上竺員智證悟禪師台州林氏子嘗舉東坡宿東
林偈曰溪聲便是廣長舌山色豈非清淨身若不到此
田地如何有這消息此庵元禪師曰是門外漢耳師求
說破庵不說師通夕不寐及曉鐘鳴得偈曰東坡居士
太饒舌聲色關中欲透身溪若是聲山是色無山無水

好愁人持以告此庵曰向汝道是門外漢一時高僧有
舒州投子通禪師蜀中仁王欽禪師金陵鐵索山主樓
子和尚神照本如禪師本嵩律師皆深于內典者也
真實代州人為五臺山僧正學佛能外死生靖康之擾與
其徒習武事山中欽宗召對眷賚隆綍真實還山益聚
兵助討敵大至真實被執金酋不忍殺勸誘百方終不
顧且曰吾既許宋皇帝死豈敢負言耶怡然受戮
長水法師嘉興人有道行註華嚴經八十一卷跣跌而寂
以丙甕合之葬真如寺建炎初金元水兵至發之見手

爪遶身復瘞之而去

永素祁門人紹興中居栢山院日誦華嚴經後住嚴州烏
龍山歲久仍回栢山一日沐浴升堂說法作偈言訖而
逝茶毗舍利滿盤

德一宜春人九歲詣仰山叅簡禪師後雲遊四方禱雨輒
應有偈云震法雷擊法鼓布慈雲兮洒甘露佇看長空
垂巨澤直教四海盡豐登紹興末忽作頌擲筆而逝
文通慧姓張氏脫俗白雲寺師令掌厠盥盆忽有市鮮者
沃于盆張偶擊之仆地死文懼奔華州總持寺久之為

長老忽曰三十年前一段公案今日當了衆問故曰日
午當自知之遂跌坐以待時張浚統兵至關中一卒持
弓矢至法堂瞠目視文將射之文笑曰老僧相候久矣
卒曰一見即欲相害不知何讎文語以故卒悟曰冤冤
相報何時了劫劫相纏豈偶然不若與師俱解釋如今
立地往西天視之已立化矣文即索筆書偈云三十三
年飄蕩佐了幾番模樣誰知今日相逢却是在前磨障
書畢泊然而化

法聰潼川人有禪學紹興戊寅至南京貢士謝堯咨與之

善一日忽書十玄談因語謝曰吾明日入滅君幸茶毗
我更十三年同為極樂遊至明日果索浴更衣跏趺而
化焚之北郊烟焰中舍利飛颺觀者如堵謝以庚寅歲
卒

自清紹興中居大山寺其性踈狂屢被師責一日謂師曰
弟子欲往京都見天子願假一乘師怒曰糞箕扛汝自
清即成一偈曰糞箕扛出轎檣回優鉢羅花向日開但
願老僧高著眼管交平地一聲雷遂辭去忽一日乘傳
至奉勅重整山門賜號曰雲風和尚

續文獻通考
顯嵩銅梁人姓李住巴州宣密院三十年餘足跡不出鄉
里紹興中集衆告以將逝作頌曰八十年來常浩浩宏
開肆貨摩尼寶也無一箇共商量不是山僧收鋪早端
坐而寂

琮師遂溪人隱湖廣岩超然拔俗足跡不至城闈李綱至
即出謁官僚欲見之乃飄然而去後趺化

祖覺嘉州人姓楊住眉山中巖寺倡鳴佛法學者雲委于
古今儒釋之書無所不讀一覽成誦作僧史數百卷有
集解華嚴經金剛經并水陸等道場儀行于世

佛日禪師柳州來賓縣金華峯第一代祖有戒行紹興中
于獅子山文殊庵端坐而逝留偈云落落托托上無把
捉出沒太虛無繫無縛鉄馬倒地誰人摸索

全了永嘉人遊山至荆門玉泉山遇天竺僧言汝緣在浙
東當得名山居之永嘉有諾詎羅者道場所適當興龍
湫宴坐此尊者棲錫地也了遂感悟至山中結庵曰芙
蓉塔曰古塔雁山之顯皆自全了發之其人放蕩人目
為了漭蕩

景宣樂清人陳氏子受業能仁寺十五歲試經得度出遊

續文獻通考
方外紹興間歸能仁越數年又居本覺平生喜讀莊子
自為註解凡三十三卷又能究極性命道德之說年九
十九雙目炯然視聽不衰及茶毗齒與袈裟皆不壞人
以為得道云

後可雁蕩雙峯寺僧善講經一日聚眾僧講于峯下有一
老人侍聽長鬚古顏眾頗異之問其從來曰某寒坑龍
也眾曰寒坑去此百餘里講不逾時何從知之而遽至
此乎曰寒坑雁蕩原是一山首尾相連地脉相通故易
知之因忽不見風雷驟起眾僧懼禱請立為祠仰而視

之則蜿蜒之狀已在雲中矣祠今在東外谷

王闡慈谿人號無功叟凡禪林宗旨天台 教門無不

洞達

紹興中一夕忽聞異香趺坐而逝茶毘之日得舍利一
百八粒

祖琇號石室不知何所人孝宗時沙門也撰隆興佛運通
論行世

可觀字宜翁華亭戚氏子乾道七年魏杞鎮姑蘇請主北
禪寺入門適當九日指座云曾中一寸灰已冷頭上千
莖雪未消老步只宜平地去不知何事又登高魏公擊

節不已寂時年九十一

靈隱松源禪師名崇岳處州龍泉人姓吳氏初造靈石妙公繼見大惠果禪師又叩應庵華公後浮海入閩見木庵永公又見密庵於衢州之西山歸處靈隱玄道盛行嘉泰二年偈曰來無所來去無所去瞥轉玄關佛祖罔措時年七十一塔于北高峯之原

淨真華亭人嘉定間為興聖寺僧有道行嘉熙三年浙江錢塘江坍具偈呈安撫趙端明日海沸江河水接連民居衝蕩亦憂煎拔身直入龍宮去要止驚濤浪拍天遂

投于海三日而返謂衆曰我在龍宮說法龍神聽受此塘不復崩矣語訖復入于海安撫上其事勅贈護國真法師

天竺北峯講師名宗印字元實鹽官陳氏子寧宗嘗召對便殿錫號惠行法師以營觀室行化吳中至松江謂其徒曰吾緣畢此乃右脇而化

善月號栢庭定海人居南湖禱雨輒應補左階僧錄史忠獻問何能斷欲答曰日遠月忘或問以安心曰心本不動天台之學以月為冠

續文獻通考
普和蒙陰人姓李氏自幼為僧頗異于眾邑之西北堂阜
社毒蛇絕路行者病之和挺身而行以手指蛇念唵字
者三蛇不能害即歸穴其患遂除年六十一跌坐而逝
智連字文秀姓杜氏鄆人嘗與宏智登千佛閣智曰聞四
明講教言空中有相連曰誠然智以手指大虛曰本無
一物其相安在連指山川樓閣曰此諸物像復是何物
智服其言後居南湖示寂之曰史太師生子彌遠適就
蓐因名之曰覺老樓鑰評之曰心大而行密體卑而道
尊恭而不勞博而不雜寂用之涯不可測也

遼

常在重熙間在寶坻縣城南隅渠水之陰建彌陀佛舍結
廬其旁持經待佛棲心入道後趺坐而化荼毘之日火
身不灰徒以其身立于佛側髮再生踰月則削之後有
女子以手捫其頂髮乃不生

金

法師蘇陀室利天竺人也特禮文殊于五臺善呪術能通
利神異頗多羽士蕭真人亦高士技術難問皆為師伏
時年一百八歲矣閔宗朝禱雨即應后妃特製赭色伽

續文獻通考
黎賜之唐括有像贊

寶公俗姓武氏磁州人慧性絕倫胸次不凡大定初於滏陽造仰山寺殿宇華麗柱上作金龍像蟠之忽有題詩柱上者曰人道斑鳩拙我道斑鳩巧一根兩根柴便是家緣了寶公大悟即入西山結茅以居徧歷諸山往峽峪寶巖寺一夕大風震地晏坐而逝

佛光道悟禪師姓冠氏蘭州人生而有齒嘗駐錫于三卿竹閣庵時著白衣跨牛橫笛游于洛川人莫之識太和五年寂

慶壽禪師名教亨號虛明任城王氏子駐錫于濟州之普照方丈後有樹一株亭亭然高丈餘郡鴉以次來巢其上下十二級如浮圖狀後教法大行興定中寂享年七十闍維焰如蓮花開合牙齒目睛不灰舍利無筭師自兒時額有圓珠至是爆然飛去收靈骨建塔
海慧遷化于皇統五年帝偕后親奉舍利五處立塔特謚佛覺佑國大禪師

元

曇無竭姓李氏幽州人幼為沙彌脩苦行嘗聞法顯等躬

踐佛國慨然有志乃入流沙經龜茲沙勒諸國進至罽
賓國禮拜佛鉢學梵書語 求得觀世音受記經梵文
一部復西八月氏國天竺界惟齋石密為糧後隨船泛
海達廣州而歸不知所終

八思巴土蕃薩斯迦人族款氏也相傳自其祖朶栗赤以
其法佐國主伯西海者十餘世八思巴生七歲誦經數
十萬言能約通其大義國人號聖童故名曰八思巴少
長學富五明故又稱曰班彌怛癸亥年十有五謁世祖
于潛邸與語大悅日見親重後尊為國師命製蒙古字

升號曰大寶法王更賜玉印

膽巴一名功嘉葛刺思西番突甘斯旦麻人幼從西天竺
古達麻失利傳習梵秘得其法要世祖時八思巴薦之
時懷夏大旱命禱立雨又嘗祝食投龍湫頃之奇花異
果上尊湧出波面取以上進世祖大悅至元末不容于
桑哥力請西歸既復召還謫潮州時樞密副使月的迷
失鎮潮而妻得奇疾膽巴以所持數珠加其身即愈又
嘗為月的迷失言異夢及已還潮期後皆驗元貞間海
都犯西番界成宗命禱于摩訶刺葛已而捷書果至又

續文獻通考
為成宗禱疾遄愈賜予甚厚且詔分御前校尉為之道
從成宗北巡命膽巴以象輿前導過雲州語諸弟子曰
此地有靈怪恐驚乘輿當密持神呪厭之未幾風雨大
至衆咸驚懼惟幄殿無虞復賜碧鈿杯十七年夏卒皇
慶間追號大覺普惠廣照無上膽巴帝師

覺慶四明人姓毛氏號壽堂自幼窮究妙典二十載棄俗
出家投禮梅峯和尚深入悟門至元初至雲間陳源家
端坐而化越三日送至茶毘之處忽遍體汗下源再請
還家是夜紅光貫天停龕十日顏貌如生鬚鬢自長四

方瞻禮者無不嘆異後源改剏所居為蘭若漆其肉身
祠之以香水救人之苦屢獲應驗

辯和尚嘗于青州創普照寺世稱青州辯和尚禪教盛行
北方二百餘年燕秦齊晉之間入是宗者皆其後學有
青州百問一卷皆與覺和尚及林泉老人問答頌偈也
法空漢州人俗姓古出家游至忻州依懶牧和尚居萬安
禪院日誦寫華嚴經大德中忽微恙誨徒出頌畢奄然
而逝茶毘之際祥光溢目得舍利十餘粒

趙迦羅昆明人世為阿拶哩僧迦羅尤精其教諳通唐梵

經書大德間鄉有蛟化為美少年挑淫婦女父老請治之即遣墨貌胡奴擒至以水噴之化為蛟斬之胡奴即大墨天神也雲南陷遂不知所往

必蘭納識里初名只刺瓦彌的里北庭感木魯國人幼熟畏吾兒及西天書長能通貫三藏及諸國語大德六年命從帝師受戒出家武宗皇慶中命緒譯諸梵經典延祐間特賜銀印授光祿大夫是時諸番朝貢表箋文字無能識者皆令必蘭納識里譯進嘗有以金刻字為表進中廷中莫能對必蘭納識里取案上墨汁塗金葉審

其字命左右執筆口授表中語及使人名字與貢物數明日有司閱其物色與所賚重譯書無少差衆服其神悟授開府儀同三司仍賜三臺銀印兼領功德使司事厚其廩餼俾得以養母至治三年改賜金印特授沙律愛護且命為諸國引進使至順二年又賜玉印改號普覺圓明廣照弘辯三藏國師三年與安西王子月魯帖木兒等謀不軌坐誅其所譯經漢字則有楞嚴經西天字則有大乘莊嚴寶度經乾陀般若經大涅槃經大乘功德經西番字則有不思議禪觀經若干卷誅後籍其

人畜土田金銀錢幣及婦人七寶粧具價值鉅萬萬云
洪源潁州人幼聰秀為親鍾愛忽夜夢釋迦佛降堂中口
誦法華經洪源敬仰久之而覺遂辭父母出家初居西
峯寺後掛錫靈岩院一日出遊卧于沙灘上有虎遶其
身至曉而去人皆異之

謝德富易州人七歲慕浮圖禮興慶寺真空為師號通辯
大師皇慶初萬山和尚奉旨大作齋會請師演法大眾
咸集升座受偈忽從法座大放光明良久方滅及示寂
白光四達得舍利數顆

本惠別號中峯杭州李氏子出家天目山為僧與攸州馮
海粟相善海粟一日叩門僧曰何人海粟答曰天下有
名馮海粟僧亦曰世間難比老中峯後海粟作梅詩一
百二十首欲以示僧未至僧先置一火爐于方丈海粟
至問曰炎月何故向火僧答曰公送臘詩故設此耳受
詩不展嗅而焚之海粟答有愠色僧曰公勿嗔當還公
原詩即援筆而錄并和詩八十首海粟曰餘四十首不
錄不和何也僧曰此令愛之作故不敢和海粟大駭手
寫華嚴經塔一幅三年而成其字細如蠅頭縱橫成文

續文獻通考
寺僧寶之食鉢一个可容三斗凡食物必盡一鉢或數日不食後復歸天童山

振藏主性慧居鄞城西海會寺一日徃定海見主家火起以杖指之乃返風而滅

衣和庵主一名知和崑山人隱居雪竇畜二虎馴伏後徒二靈山終焉大德丁未菴為盜燬虎為人害咸謂菴復則虎息至元丙子復其菴肖像于中虎不為害

明本號中峯杭州人幼聰悟傳涉書史為文未嘗構思援筆立就四方從遊者甚眾仁宗賜號廣慧禪師及沒文

宗賜謚智覺元統中詔以其廣錄刻梓命揭傒斯為序
梵琦象山人字楚石性穎發博通內外典泰定中住海鹽福臻寺我朝嘗以高僧召之

訖笑隱名大訖南昌人幼開爽頓悟禪機研窮教典旁及儒家道流之說文宗時召赴闕特賜三品文階嘗編禪林清規所著有四會語錄及蒲室集

月林澄連人幼穎悟入山苦行脩習後住持普明寺文宗賜楮幣甚夥未嘗私用悉留寺帑年五十涅槃作偈曰昔不曾生今何曾滅月過長空清光皎潔趺坐而化焚

時有五色舍利

善道臨淄人入大藏信手探卷得觀無量受佛經及往廬山觀遠公遺蹟豁然增思後遁迹終南復往晉陽從綽禪師入定七日報綽曰師當懺悔三罪綽乃洗心謝過道行化京師忽曰吾明日歸去至期怡然念佛而逝祖公輝縣人自幼穎悟精勤戒律任持白茅寺一日杖策閑遊謂其徒曰寺東山塢間脩篁古柳異于他年乃吾棲真之所竟如其言

古峯和尚姓周氏為盤谷寺僧甘心守靜脩廢寺三十餘

所悟三空之性理為一代名僧

李溥光大同人號雪庵幼為僧讀書工詩善書法一時宮城殿宇扁額皆出其手授昭文館大學士有雪庵長語大字書法行世

獨孤標和尚住潼泉山趺坐而逝偈言未來事後皆驗源空威楚人三歲能誦佛號後入薇溪山為僧嘗遊螺髻山有虎伏于岩下又遊九重巖入定絕粒經月凡有齋事必先知之一日端坐而化茶毘之日祥雲幕焉連精定遠人通瑜伽秘密教降龍伏虎應驗如神至正間

續文獻通考
雲南旱梁王迎之祈雨師于淨瓶中出一小蛇遂大雨
王贈以金帛固辭歸之日役鬼為荷擔一日辭親戚端
坐而逝

徑山雲峯妙高禪師

世祖時

五臺真覺文才國師

成宗時

上都華嚴至溫禪師

武宗時

三藏沙囉巴譯師

仁宗時

京都崇恩謙講師

京城普慶法聞律師

三藏達益巴國師

京城寶集妙文講師

已上俱仁宗時

五臺普寧了性講師

五山普安寶嚴講師

大都妙喜尼舍藍藍

臨壇大德惠汶律師

已上俱英宗時

皇明

吳印鍾山一主僧也有才智 太祖親擢為山東布政使

時按察使張孟廉才望自負以印出身為僧心不下之
每較轆印後印上書言狀且請去位避孟廉之橫 太
祖怒召孟廉至京以逆棄市詔印曰吾除尔害矣善為
之方孝孺論曰孟廉為人忠實無險賊心祇以尚氣好
高以故為人所陷才能者人欲得也苟無謙遜以承之
而挾以轆人其為身害奚怪哉

來復字見心豫章人先是為明天淵以人才仕元至學士

續文獻通考
因亂遂祝髮為僧改今名云為人髯甚長後為僧而髯
如故尤工于詩所與遊皆名士初為給事中嘗賦聽雨
詩云掛冠瀛得賦閒居聽雨浮羅老故廬夜滴梧桐燈
盡後曉臨荷芰酒醒初打窻聲稱江濤急入坐寒兼地
籟虛忽憶候朝天上去更愁泥滑出無驢又一日送李
宗遠歸廣東詩云三山水落鴈啼霜虎踞關頭買小航
明日相思望南斗水流不盡楚天長又云太平身退更
何憂歸老南山問故丘一色梅花三萬樹夜和明月醉
羅浮又云聞說高侯氣膽寒校詩多在白雲窻秋來柳

子耳如密寄我須絨五百雙又云鸚鵡盃深泛紫霞風
涼渾訝謫仙家錦袍留客催春鶯開遍東園豈蕊花曾
次清灑出塵溢為詩章類如此時僧宗泐著稱復與之
齊名 太祖嘗誦其所為詩文稱賞久之時蜀王雅志
釋典禮遇復甚隆王在中都構西堂讀書召儒臣日與
講論復亦在列又建寶訓堂以奉祖訓及前代帝王經
典命復作記王又為正心觀書崇本敬賢四箴以自警
復亦代草以故得達 太祖一日召問曰汝不欲仕我
而去出家為僧然留鬚亦有說乎對曰削髮除煩惱留

鬚表丈夫 太祖笑而遣之又一日召見賜之膳既罷
復上詩稱謝詩云淇園風雨曉吹香手挽袈裟近御床
下彩雲生 尾座中金笈動龍光金盤蘇合來殊城
玉盞醍醐出上方稠疊濫承天上賜自漸無德誦陶唐
太祖覽詩大怒曰汝詩用殊字是誦我為歹朱耶又言無
德誦陶唐謂朕無德則雖以陶唐誦我而不能耶何物
奸僧敢大膽如此欲殺之復遂玉筋雙垂圓寂于丹墀
之下蓋亦有得者或曰見心之從釋也亦從赤松子之
志歟有蒲菴集行于世

按野記謂見心初被徵其師訴笑隱止之曰上苑亦
無頻婆果且留殘命吃酸梨復不聽及臨刑而悔因道
訖語 上聞逮訖至將殺之訖曰此故偈臣偶然非有
他也 上問何出訖曰出大藏某錄在某函某卷某葉
檢視果然乃釋之

板的達天竺中印度僧也元至 正甲辰至燕京受灌頂
戒 洪武甲寅至金陵召見稱 旨賜印號善世禪師
居蔣山統制天下諸山仍移文各郡許詣蔣山受菩薩
法戒所司勿禁人多繪象事之以為活佛 御製善世

歌有談笑般若生蓮花之句尋遊方三年復還蔣山賜
金環茜衣 車駕臨幸必造其室咨問法要屢賦詩有
曰晨向巖前觀日出暮投松底聽風來蓋規之也辛酉
五月患疾卒死無他異葬天禧寺而屋之

永隆蘇州人異僧也時 洪武二十五年 太祖頒度僧
之令冒度者遂至三千餘人 上怒命錦衣衛悉
隆上言願焚身代諸僧之死 詔許之勅中官以武士
衛其龕至雨花臺隆從容出龕望 闕叩辭遂入龕書
偈一首又取香一瓣書風調雨順四字于其上謂中官

曰願奏 陛下遇旱以此香祈雨必驗遂秉炬自焚體
骨不倒異香逼人群鶴舞于龕頂上中官復命 太祖
乃宥衆僧會歲大旱 命以所遺香于天禧寺禱雨至
夜果大霑 上曰此真永隆雨也 御製魄僧傳以吊
之

僧善啓字東白號曉菴姓楊氏蘇州長洲縣人甫能言通
佛典父母異之命入無量壽院禮永茂院主為浮圖既
長屏迹龍山窮日夜力于經史百氏不廢聲譽隱然日
起少師姚公廣孝善世洽公南洲皆器重之而典記于

洽公者甚久 永樂中召纂修永樂大典預校大藏經
賜金織袈裟一襲會三殿灾 詔求直言上疏陳利
病不報尤工于詩所交如少卿沈民望侍講王希範贊
善王汝玉檢討陳嗣初皆名士也年七十五示寂曉菴
尤喜儒詩律倣劉長卿選兼韋應物至于為文喜柳宗
元遇有作必朗誦數篇得其意趣然後下筆論儒釋之
辨則曰且各為其教又曰東魯垂道西竺見性皆莫先
于原本故雖離父母而養生送死率從厚與兄弟極友
愛撫諸姪教養兼至而交遊四方宿儒名緇必以誠未

嘗見懈體惰容然非其人未嘗一與之交此韓子所
墨名而儒行王文正謂此失之而彼得焉是也錢 銘
其墓曰唐有師暢曰喜文辭宋有惠勤亦號能詩暢由
韓子儒以行彰勤藉蘇公得附毆陽顧今東白有學有
德旁遂詩文兼此二釋豈無韓蘇俾世有聞

僧泐浙江台州人應天府志稱泐季潭是也性頗聰慧凡
經書一目輒能誦長尤博涉古今善屬文住持京師天
界寺 太祖嘗幸寺見泐動止異常人因令其蓄髮欲
官之泐固辭尋 奉詔註心經金剛楞伽三經及 馬

后崩葬之日會 太祖高皇帝景命之日乃有醴泉出
神樂觀清光浮于玉甃芳氣達于 靈宮 頒賜百僚
味勝醇醪又三日甘露降于 孝陵滿布松柏諸臣復
拜寵賜 是年徵天下道士至京即朝天宮神樂觀
洞神宮陳金籙普度大齋科自十一月庚申訖丙寅凡
七晝夜 車駕幸齋壇時祭酒胡儼奏曰 陛下舉明
禋之典篤追遠之城下逮臣庶祖考一視同仁禮神之
儀冊祝之文玉帛薰蕕之登薦鍾鼓法樂之導宣罔不
備具將事之晨鸞鶴翔于太虛度幽之夕甘露降于階

庭越明日復有群鶴踰躑東來徘徊殿廷之上二月戊
辰風雨電震 上甚不樂忽召泐至謂之曰 太后將
就葬汝其宜為偈泐應聲曰雨落天垂淚雷鳴地舉哀
西方諸佛子同送馬如來 上悅頃之天霽遂啟輶
詔賜泐白金百兩有金室集行于世

金碧峯宣州一異僧也姓石氏六歲依雲寂温法師為弟
子一云石寶金永壽人號壁峰禪師有異行常遊峨眉
山絕粒啖栢嘗趺坐大樹下忽溪水橫溢人疑已死越
七日水退趺坐如故此歸即州治西草室靜息焉後遊

五臺元順帝召至燕慰勞甚至後 太祖渡江偶一元
 臣迎謂曰今欲霸我將財貨納贖 太祖叱曰我本順
 天應人行王道汝敢霸視我耶元臣曰若篤行王道可
 尋宣州胡僧金碧峯必有所授 車駕幸齊壇是時見
 有卿雲天花甘雨甘露舍利祥光青鸞白鶴日集及金
 仙羅漢于雲端白象青獅莊嚴妙相天燈導引幡蓋旋
 繞而下又一夕檜栢生金色花徧都城有之又聞梵唄
 拜音天樂自空而降群臣表賀 上悅賜金百兩銀千兩
 綵段寶鈔織金珠袈裟金銀器皿其鞍馬儀仗與郡王

埒從者字羅葦悉封為大國師並 賜印誥金幣等仍

召至華蓋殿宴之自是屢著靈異謂之神通教人念唵

音汗又唵音呢音泥音叭音葩音囉音吽音忻音信者晝夜念之大學士胡

廣作聖孝瑞應歌以獻 上亦潛心釋典作為佛曲使

宮中歌舞之唯翰林侍讀李繼昇私曰若彼神通當中

國語何待譯而後知或者服其議

嘗 諸書載白溝河之戰陣亡軍士積骸遍野 成

祖每念之 命取其頭骨規成數珠 賜內官念佛冀

其輪 又顛骨深者大則以盛淨水供佛名天靈盃皆

胡僧教也今其珠聞 內府猶有之色類象骨而紅潤
過之

尚師哈立麻西方僧也 永樂四年丙戌冬十二月至京
駕往視之合掌不拜初 成祖為燕王時聞西域烏
思藏有異僧尚師哈立麻及即 位遣中官侯顯以書
幣迎之往返凡五歷寒暑至是抵京 上命居於靈谷
寺封為萬行具足十分最勝圓覺妙智慧善普應佑國
演教如來大寶法王西天大善自在佛領天下釋教
明年丁亥春二月即靈谷寺啟建法壇命尚師哈立麻

薦福 皇考 皇妣尚師率天下僧伽舉揚普度大齋
科十有四日

尚師毘澤思巴乃尚師哈立麻之徒永樂十年封為萬行
圓融妙法寂勝真如慧智弘慈廣澤護國宣教正覺大
乘法王西天上善金剛普應大光明佛

尚師劄巴堅叅西僧也 成化中封 為萬行莊嚴功德

寂勝智慧圓明能仁感應顯國光教弘妙大悟法王西
天至善金剛普濟大智慧佛領天下釋教事尚師即
帝師史諱之也按元時贈帝師有皇天之下一人之上

其稱尤異然不去佛而云佛子又其他街名亦小南陽大瓢和尚飲嗽兼人因曰大瓢誓造某橋而居其旁欲得大壇那成之始為無量功果每呼曰誰造此橋願捨和尚作某子孫而唐王居宮中相距十五里耳邊若聞呼聲以問其閹豎閹曰呼此者大瓢和尚也相距遠矣命來使試呼果如所聞異之遂傾藏發三千金造橋橋成一日宮中人皆見和尚闖入宮扉而闈中報世子生其時跡和尚所在適已坐化後世子嗣立慈慧夙成每飯僧至千人曰千僧會豈偶然哉

神針大元禪師諱現本漢中人後駐錫西山潭柘寺精素難脉理及八法神針諸症針下即瘳於傷寒胎產起死恒多 宮禁大璫戚里貴人皆尊事之而小璫受其法數人一士夫患頸癭衆治不效大元至針手外關足三里金針信手投下徐命童子輪轉已視患處消大半滿堂頂禮呼頌師曰寒冬針力不勅必春至始痊後果然不二禪師居太岳虎耳巖菴就巖起觀音亦坐巖窟中禪榻數處各據幽勝在長松細竹泉石間梵放時坐以遊心不受金帛紛以米餉然擔夫在道坐憇米囊則知之

續文獻通考
卷之九
曰汝在某處如此不敢以供故不受人益神之自是無
敢坐憇米囊者與人談亦隱隱及未來時多驗江陵相
遣子孝廉往候願受法旨禪師不言但貽以衲頭不數
年身死禍作禪師曰早著衲去當不至此

詩僧 詩尼附後

唐

辯才貞觀時僧智永之弟子嘗與御史蕭翼偈和

法宣貞觀時僧有和趙郡王觀妓應教詩未云舞袖風前
舉歌聲扇後嬌周郎不相顧今日管絃調

中寤蜀僧也儀鳳中青城翠圍山下有王仙柯得道中寤
贈詩曰瞻恩不及望仙兄早晚升霞入太清手種一株
松未老爐燒九轉藥新成心中已得黃庭術頭上應無
白髮生異日却歸華表柱好教凡俗盡聞名
處一天寶時詩僧

子蘭有飲馬長城窟秋日思舊山詩傳世

皎然姓謝字清晝吳興人靈運十世孫居杼山嘗于舟中
杼思古體十數篇求合韋蘇州韋大不喜明日獻其自
製乃稱賞云何不 以所工見投而猥希老夫之意人

各有所得非卒可至畫大服其鑒裁之精又一僧袖御
溝詩示之曰此波涵帝澤畫曰詩則佳矣只波字未善
僧怫然而去畫乃書中字于手須臾僧復至曰欲改中
字何如畫以手示之遂相與定交有杼山集十卷又有
杼山詩式行世

靈徹生于會稽居東林寺本湯氏字澄源與吳興詩僧皎
然遊皎然薦之包佶李紆以是名顯貞元中遊京師為
嫉者造飛語以罪徙汀州元和十一年終于宣州開元
寺建塔天柱峯有詩二十卷劉夢得曰詩僧多出江右

靈一道其源護國襲之清江揚其波去振沿之如公絃
孤韻瞥入人耳非大音之樂獨吳興畫公能備衆美徹
公承之可謂入作者閭域

靈一越中雲門寺律師持律甚嚴尤善于詩與劉長卿皇
甫冉嚴維相倡和大曆貞元間人有詩集一卷

護國大曆時江南人亡後張為嘗哭以詩

清江大曆時人與嚴維相厚章八元同唱和

廣宣會昌間有詩名與劉夢得最善後以應制詔許居安
國寺紅樓院以詩供奉有紅樓集行世

法振與廣宣同時李益嘗與酬倡往來一作法貞

常雅題伍廟詩云精覓不知何處去威風猶入浙江潮

隱求題名橋琪樹云山上天將近人間路漸遙誰當雲裏

見知欲渡仙橋

法照大曆時人與錢定清江同時

無本即賈島也騎驢作推敲勢衝韓愈尹節不知愈詢其

故對曰方得詩句鳥宿池邊樹僧推月下門忽欲易推

作敲未定耳愈曰敲字佳矣遂與定交後還俗以進士

為長江令

僧泚大曆時人

冷然唐末時人

應物武宗大中時江南詩僧也與羅鄴倡酬作九華山記

含 曦盧仝訪曦上人留詩于壁曦酬之曰鯨吞海水盡

露出珊瑚枝海神知貴不知價留向人間照夜光

文秀唐末吳僧也居長安以文章應制鄭谷嘗有詩贈之

中秋旅懷詩云望鄉連北斗聽雨帶西風

開成間與劉得仁倡和朝廷嘗賜紫檀衣令隨駕以

詩供奉有詩集一卷

無可賈島弟姚合李洞皆有詩贈之有詩集一卷

懷濬居秣歸郡不知何所人昭宗時言休咎有驗刺史于公以惑衆繫而誥之乃以詩代通狀曰家在閩山西復西其中歲歲有鶯啼如今不在鶯啼處鶯在舊時啼處啼又誥之復有詩曰家在閩山東復東其中歲歲有花紅如今不在花紅處花在舊時紅處紅于異而釋之詳其詩意似在海中殆杯渡之流乎

虛中宜春人居玉笥山與齊已尚顏棲蟾為詩友有碧雲詩一卷司空圖嘗贈以詩曰十年太華無知己只得虛

中一首詩

齊已姓胡名得生潭之益陽人謁鄭谷詩云自封脩藥院別下著僧床谷覽之曰請改一字方可相見經數日再謁稱已改得云別掃著僧床谷嘉賞結為詩友有白蓮集十卷又外編十卷

曇域齊已同時人

棲蟾齊已同時人

清寒東洛人姓周氏少從浮圖法遇姚合而返易名賀與賈長江無可齊名

尚顏自云師賈閻仙為詩有懷陸龜蒙處士寄方千處一
等作詩一卷名供奉集

處默越僧羅隱同時人

可止有哭賈島詩云詩僻降今古官卑誤子孫

太易與司空曙相厚有贈司空拾遺詩

貫休字德隱姓姜氏蘭溪人嘗以詩投錢鏐曰滿堂花醉
三千客一劍霜寒十四州鏐欲改十四為四十休曰州
亦不可增詩亦不可改明日遁去歸蜀居和安寺蜀王
賜紫衣號禪月大師有禪月集三十卷行世一曰西嶽

集

脩睦貫休同時人有東林集一卷

可朋丹稜人有詩千餘篇號玉壘集性好酒自號醉髡孟
昶鎮蜀時歐陽炯與僚佐納涼宴飲朋作耘田擊鼓歌
以進曰農舍田頭鼓王孫筵上鼓擊伐兮皆為鼓一何
樂兮一何苦上有烈日下有焦土願我天公降之以雨
令桑麻熟倉廩當不飢不寒上下一般烟遂徹飲君子
謂可朋善諫歐陽善聽

神穎宿嚴陵詩曰寒谷荒臺七里洲賢人永逐水東流獨

猿叫斷青天月千古滇潭樹秋

雲表寒食詩曰寒食悲看郊外春野田無處不傷神平原

累累傷新塚半是去年來哭人

惟審有題曉鶯詩人共傳之

滄浩有留別嘉興知己詩為人誦

良又秋山蒼盧鄴曰風泉只向夢中聞身外無餘可寄君當

戶一輪惟曉月掛簷數片是秋雲張為取作主客圖

志定工于詩有曰惟有樽前今夜月當時曾醉墮樓人曰

梧桐葉老蟬聲死一夜洞庭波上風

曇翼

無悶

文益

景雲

護國

江南人

棲一

卿雲

澹交

若虛

子蘭

僧巒

有蜀中送人遊廬山詩恐是蜀僧

懷楚

懷浦

慕幽

善生

理瑩

尚志

歸仁

寶月

隱巒

清尚

玄寶

已上俱有詩名

宋

可尚螺江人有送徐鉉詩蓋宋初人其集名棟金一卷

惠勤餘杭人嘗從歐陽脩遊三十餘年脩稱其為人聰

明才智有學問尤長于詩蘇軾有送錢塘勤上人詩序

參寥子名道潛於潛人過臨平詩曰蒲風獵獵弄輕柔欲
立蜻蜓不自由五月臨平山下路藕花無數亂汀洲蘇
軾時知杭大稱賞卜智果精舍以居又為作參寥泉銘
又嘗舉其詩曰隔林彷彿聞機杼知有人家住翠微此
吾師十四字師號也蘇軾稱其詩無一點蔬筍氣體製
絕似儲光羲陳師道相與論詩深偉之序以送別其畧
曰釋門之表士林之秀而詩苑之英也

祖可字正平蘇養直之弟寓京口少病癩人呼曰癩可善
于詩有瀑泉集十三卷徐俯為作詩序謂近歲江南高
僧逸民出語可觀皆祖可所化也

安州人常於蘇樓上倒書一絕云天長地久大悠
悠爾既無心我亦休浪迹姑蘇人不管春風吹上酒家
樓與蘇軾為莫逆交平生嗜蜜軾與詩曰安陸老人心
似鐵老人心肝小兒舌不食五穀惟食蜜笑指蜜蜂作
檀越遂自稱殊蜜有文曰寶月集

禪鑑汀州人名智孜長于吟咏四皓詩曰因秦生白髮為
漢出青山

有禎福清人幼穎悟好讀書骨相秀奇落髮為僧遂潛心

續文獻通考
本宗閉戶獨處若禪定然緇流聞風信向叢集者衆說
法作頌皆造其極後端坐示寂著有平山詩集

吳三詩僧夷堅志云吳中僧多能詩法具絕句云鶴鳴九
臯秋夜永紙帳芙蓉卧燈影九州之外更九州誰解摩
心發深省蘊常咏石菖蒲詩云細水圍碁石纖纖手自
移幾年離雁蕩萬里到天池法平登比固樓詩云不負
南徐眼來看北固雲金焦兩山小吳越一江分三僧者
皆勝流有唐人風致

按法具字圓復有化庵湖海集二卷

饒節字德操號如璧嘗為曾布客以剛介不合祝髮為浮
屠有詩二卷名竒松集

惠崇淮南人與潘閬同時在九僧之數有惠崇集十卷
遵式錢塘人號式懺王有天竺靈苑集三卷採遺三卷
文瑩字道溫錢塘人識蘇子美嘗題其詩後欲挽致于歐
陽永叔而瑩辭不往老子荆州之金鑾有渚宮集三卷
鄭毅為作序

有朋號困山禪師族陳氏閩帥巖六世孫有螺江集一卷
秘演與石曼卿交最久亦能遺世外俗以氣節自高曼

卿稱所作雅健有詩人之意其集歐陽公為序

惟儼杭州人姓魏氏歐陽公序其與石曼卿最善居京師

相國浮圖不出戶十五年有集十二卷

希白有詩三卷張逸序之曰希白能詩與宋白梁周翰張

詠而下十數公友善其詩格不減齊已云

洪覺範已見法嗣其詩有物外集三卷

善權字巽中靖安人嗜酒落魄有真隱集三卷

顯萬有浯溪集二十一卷洪景盧作序內二篇為賦餘皆

詩

妙源字晉之慈谿人嘗衣絮花衣服鉄襪口誦佛號不徹
無跣足乞食于道後示寂願以身飼烏鳶善為唐詩人

傳誦之

元末 噩禪師號夢堂姓王氏住持慈谿東臯寺久與金

華脩道先生胡公游寂時偈曰塊然一物或有或無翻

身歸去踏破毘盧有詩集行世宋景濂為序

皇明

來復字見心南昌人

宗泐字季潭臨海人

妙聲號九臯吳人

守仁字一初錢塘人

道原名宗衍

德祥號上庵杭人

懷海

梵琦字楚石

永彛字古鼎雲間人

懷讓字不虛越人

正淳

天祥

非幻諱性欽住摩訶菴能詩善小楷書皆得空覺之趣有

喜客過訪詩曰禪門重繫馬灑脫利名羶榻借松陰翠

盃含菊蕊香清談名理窟幻有刹魔場亦是看心侶皈

依禮法王又有壽人詩曰釋理遺生滅端為不滅因金

剛摧朽木寶筏濟通津我眷華封祝君家貝闕人沅江

濤捲雪遙識謝池春

唐末有海印者為尼于悲光寺才思清俊有舟夜一章云

水色連天色風聲益浪聲旅人歸思苦漁叟夢魂驚舉

棹雲先到移舟月逐行旋吟詩句罷猶見遠山橫

續文獻通考卷之二百五十四終

續文獻通考跋

夫王光列宿文有自未少微德
精獻所由肇兩者皆先王精蘊
之所寄而後人印證之所資苟
精蘊無所寄則雖有志慕古安
所印證乎此仲尼傷文獻之無
徵而馬貴與以之名其書也然
經傳子史即文即獻聖賢貞烈
即獻即文其義原非有兩故吾

洪洲王夫子所續通考復益以道統節義謚法諸目蓋自秦燔之後吾道僅々不絕如縷而立德立功之士亦寥寥如寒林之蟬間有闡繹聖道若揭日月而中天而又能抗節秉義慨然以名教自任是宣六經之鼓吹振五常之鼎呂此之謂文獻甯止一蠹簡一逸民之以此道統節

義之所繇益也蓋不以明禮之文獻而遺明道之文獻則吾師意耳吾師以戴記起家敝歷中外可三十年一旦致楚學政歸續為此書芟繁剷蕪歷十七年所甫就緒微獨憲令經制賴以鋪張而道統節義諸賢得吾師詳載褒嘉照耀來禩即華袞不啻穆升以三立為不朽我師

其兼之矣我師生平著述甚富
嘗莊誦類稿諸奏疏勁氣侃詞
有骨鯁風而詩若文膾炙人口
蓋神識晶洽學術淳雅屹然一
東海文獻巨家故能漁獵百氏
成此大業非若雕虫家沾沾以
一技自見者若夫子作春秋雖
游夏不能贊一詞况不肖儼何
人斯敢挿齒類第喜茲集之成

而妄綴數語于末云爾
松江府學訓導門生何儼拜書

續文獻通考

同治
藏書



續文獻通考

三